

**Persiapan Istiadat Pertabalan Yang Di-pertuan Agong Lancar
Bernama
6 April, 2012**

KUALA LUMPUR, 6 April (Bernama) -- Persiapan istiadat pertabalan Yang di-Pertuan Agong ke-14, Tuanku Abdul Halim Mu'adzam Shah yang akan menjadi upacara pertabalan sulung di Istana Negara yang baru Rabu ini, berjalan lancar.

Pemangku Datuk Paduka Maharajalela, Azwan Effendi Zairakithnaini yang merupakan penghulu istiadat Istana Negara, berkata hampir 70 peratus persiapan telah dilaksanakan bagi menyambut kehadiran kira-kira 1,000 tetamu termasuk Raja-raja Melayu, pembesar negara dan duta asing.

"Baki 30 peratus adalah perkara-perkara kecil yang kita jangka dapat diselesaikan sebelum istiadat itu nanti. Kita akan berusaha bersungguh-sungguh agar upacara dapat dilakukan secara gilang-gemilang," katanya ketika ditemui Bernama pada raptai kedua istiadat pertabalan di Istana Negara, Jalan Duta, di sini Jumaat.

Azwan Effendi, 32, yang merupakan antara pegawai termuda yang bertanggungjawab mengetuai istiadat pertabalan itu, berkata kira-kira 400 petugas istana terlibat dalam merealisasikan upacara tersebut yang dirancang sejak enam bulan lepas.

Beliau berkata antara fokus diberikan pada tiga bulan terakhir ini adalah bagi pengubahsuaian tempat-tempat yang terlibat seperti balairong seri dan dewan santapan serta urusan jemputan tetamu kenamaan.

Ditanya mengenai cabaran mengetuai istiadat buat pertama kali, Azwan Effendi berkata antaranya ialah mengumpulkan semula mereka yang terlibat dengan upacara pertabalan terutama ketika istiadat pertabalan Yang di-Pertuan Agong ke-13 Sultan Mizan Zainal Abidin dari Terengganu pada 26 April 2007.

Cabaran lain ialah mengkaji semula komponen penting yang perlu ada dalam majlis tersebut, katanya yang mula bertugas dengan Istana Negara ketika era Yang di-Pertuan Agong ke-12 Tuanku Syed Sirajuddin Putra Jamalullail dari Perlis.

Azwan Effendi berkata selain itu, petugas Istana Negara serta agensi kerajaan yang lain juga perlu menyesuaikan diri dengan keadaan istana baru yang ternyata lebih besar daripada istana negara lama.

Katanya saiz balairong seri Istana Negara yang besar boleh menempatkan sehingga 1,000 tetamu berbanding hanya 300 ketika di Istana Negara yang lama.

"Kita pastikan semua kemudahan yang ada merupakan yang terbaik bagi membolehkan rakyat seluruh negara menyaksikan istiadat ini nanti," katanya.

Raptai kedua hari ini yang bermula pukul 9 pagi sehingga 12 tengah hari memperlihatkan petugas istana, anggota Rejimen Askar Melayu Diraja serta anggota polis trafik mengambil bahagian dalam istiadat pertabalan.

Raptai penuh istiadat pertabalan akan berlangsung Isnin ini.

---BERNAMA

Hakcipta © 2012 BERNAMA

Source: <http://www.bernama.com/bernama/v6/bm/newsindex.php?id=657517>